

■ NATOk bilera garrantzitsua egingo du Washingtonen hurrengo hilabetean

NATO-K bilera garrantzitsua egingo du hurren hilabetean, Washington hirian (EEBB), «NATO Europako defentsako erreferentzia delako», Gai Politikotarako eledun Klaus-Peter Klaiber-ek esan duenez. Polonia, Txekiar Errepublikak eta Hungariaren elkartzeari goraipatu zuen Klaiberrek, «NATO herri guztientzat zabalik dagoela erakusten baitu».

T X E K I A

■ Txekiako Gobernuak holokaustoko artxiboak zabalik daudela baieztatu du

TXEKIAR Errepublikako Gobernuak juduen holokaustoko artxiboak zabalik daudela baieztatu zuen atzo. Txekian da Lawrence Eagleburger, II. Mundu Gerran desagertu juduen asegurua ordaintzeaz axolatzen den arduraduna. Eageburgerrek eskertu egin zuen Gobernuaren adierazpena. Artxibo horiek itxita zeudela salatu zuen berriki Israelgo lehen ministroaren aholkulari Bobby Brownek, eta polemika handia sortu.

A U S T R I A

■ Aire eremutik igarotzea debekatu diote barra erradioaktiboak daramatzan hegazkin bati

ALEMANIATIK Esloveniako Krsko zentral nuklearrera zihoan hegazkin bati Austriako aire eremutik igarotzea debekatu dio hango gobernuak, arriskutsuak izan daitezkeen barra erradiaktiboak garraiatzen ari delako.

‘Dumas kasua’ berriz ireki dute

Deviere-Joncourrek egindako akusazio berrien ondorioz hartu du erabakia Parisko Fiskaltzak

Allande Sokarros / Baiona

Dumas aferak beste bultzada bat hartu zuen atzo, Parisko Fiskaltzak sumarioa berriro irekitzeko agindu baitzuen. Christine Deviere-Joncour andereak akusazio berriak eta zehatzak egin ditu Frantziako Atzerri ministro ohiaren aurka Joly eta Vichnievsky epaileen aurrean —zeinak *Elf auzia* ikertzen ari baitira—, eta horregatik hartu da erabaki hori. Roland Dumasen etorkizun politikoa nahiko goibel ageri da, eta gero eta presio handiagoak dira Kontseilu Konstituzionaleko presidentzia utz dezan.



Roland Dumas ministro ohia eta Eva Joly epailea, auto batean sartzen.

«ESPERO dut justiziak bere lana azkar egingo duela; ez diot beldurrik, eta nahikari bat besterik ez daukat: hau da, egia agerian jar dadin». Hala adierazi zuen atzo Roland Dumas Kontseilu Konstituzionaleko presidentea, Europe 1 irratian. Christine Deviere-Joncour andereak Eva Joly eta Laurence Vichnievsky instrukzio-epaileei asteazkenean egindako deklarazio harrigarriak nahi izan zituen, hala-ber, gezurtatu 1990a eta 1993a bitartean Frantziako Atzerri ministro izandakoak, eta «jukurtria edo mitomaniatzat» jo zituen. Alabaina, Roland Dumasen maitalea izandakoak bere kabuz egin zituen adierazpen horiek dute Parisko Fiskaltza *Dumas auziko* sumarioa berriro irekitzera bultzatu. Ezen auzibide hori iragan

otsailaren 12an amaitutzat jo zuten Joly eta Vichnievsky epaileek, eta Kontseilu Konstituzionaleko presidentea «gizarte ondasunen lege kanpo erabileran laguntzaile eta gordetzaile» izateagatik epaitzekotan egon zen.

Iragan asteazkenean, Deviere-Joncour andereak egindako testigantza gogor eta zehatzaren arabera, Atzerri ministro ohiak jakinaren gainean onartu zuen Elf petrolio sozietateak, Deviere-Joncourren bitartez, emandako dirua, eragintza lan bat egitearen truke. Hala, Deviere-Joncourrek epaileei ziurtatu dienez, Roland Dumasek zuen Loik Le Floch-Prigent izendarazi Elf sozietateko zuzendari nagusi, eta, sustengu horren

ordain, petrolio sozietateak diru asko eman zion ezkutu: 14 milioi libera, Deviere-Joncourren arabera betiere.

«Elfen dirua zuritzen lagundu ninduen»

Akusazio are larriagorik ere egin zuen Deviere-Joncour andereak, hala nola Roland Dumasek laguntza eman zionla Elfetik jasotako dirua garbitzeko, bere adiskideetarik zuen banku zuzendari baten bitartez. Dumasen diru goseaz adibiderik ere eman bide die epaileei Deviere-Joncourrek, hala nola ministro ohiak Hotel de Beauvais luxuzko hotel historikoa erosi nahi izan zuela Elfen diruarekin.

Frantziarrek Dumasen dimisioa nahi dute

1998ko apirilaren 29az geroztik auzipetua egon arren, Roland Dumasek ez du behin ere Kontseilu Konstituzionaleko presidentzia uzteko asmorik azaldu. Jarrera horri eutsi zion atzo ere Christine-Deviere-Joncourrek egindako salaketa berrien biharamunean. Alta bada, *Le Parisien-Aujourd'hui* egunkariak atzo argitaratu zuen CSA inkestaren arabera, frantziarren % 58k nahi dute dimisioa eman dezan. Horrez gain, badirudi mundu politikoa, Chirac Errepublikako presidentetik hasi, orain arte Dumasi azaldu dion elkartasuna desegiten hasia dela.

Schroederrek dioenez, EBko krisia azkar konponduko da

■ Alemaniako kantzilerra Chiracekin bildu da Santerren ordezkari hautagaiez mintzatzeko

Agentziak / Brusela

DATORREN asteazkenean eta ostegunean Europako Batasuneko buruzagiak Berlinen bilduko dira, Europako Batzordearen dimisioak eragindako krisiari irtenbidea emateko. Azken egunotan EBko liderrekin bildu ostean, Alemaniako kantzilerrak atzo esan zuen krisiari «konponketa azkarra» eman nahi diotela buruzagi denek. «Berlin go gailurra arrakastatsua izango da», adierazi zuen Schroederrek, baina ez zuen aipatu nahi izan Europako

Batzordeko buruaren inguruan akordiorik lortu duten. Ziurtatu zuenez, EBko buruzagiekin hitz egindakoaz ez da ezer filtratuko, hautagaiei «kalterik ez egiteko». «Arrakasta lortu nahi bada, isilik egoten ikasi behar da», esan zuen. Jacques Chirac ere Schroederren iritzi berekoa da.

Atzo Parisen azaldu zuenez, Frantziak eta Alemaniak hautagaien inguruan ideia bertsuak dituzte, baina gaineratu zuen EBko batzordeburua Hamabostek aukeratu tuko dutela, «ez Frantziak, ez

Alemaniak». Chiracek ez zuen gehiago zehaztu nahi izan.

Italiako Gobernua, ordea, bestela jokatzeko ari da eta, atzo bertan, Romano Prodi lehen ministro italiarra proposatu zuen ofizialki. Lehen Toni Blairrek egin bezala, atzo Jacques Santer dimititu berriak ere Prodiaren alde egin zuen. Prodiaren lehiakidea Javier Solana izan liteke.

Bestalde, Berlingo gailurrean, «datozen zazpi urteetarako arkitektura finantzarioa» erabakiko da, Schroederren arabera.